

Headlines

1. मुखमन्त्री उमर अब्दुल्ला होरें आक्खेआ ऐ जे राई-बाई दा खेत्तर, जम्मू-कश्मीर दी अर्थबवस्था दी रीढ़ ऐ ते उंदी सरकार, करसानें दे सशक्तिकरण लेई वचनें बज्झी दी ऐ।
2. केन्द्री रेल मंत्री अश्विणी वैष्णव होरें जम्मू च हाड़ें दी मारै हेठ आए दे इलाकें तोहड़ी सहायता पुजाने लेई बशेश रेलगड्डियां चलाने गितै रेलवे दी सराहना कीती ऐ।
3. मंत्री सतीश शर्मा होरें जरूरी चीजें-बस्तें दी सप्लाई, स्थिति ते दुहाई दा जायजा लैता। तकरीबन 400 ट्रक हर रोज जम्मू-कश्मीर दे बक्ख-बक्ख हिस्सें तोहड़ी जरूरी चीजां-बस्तां पुजाने दा कम्म करै करदे न।
4. मुख सचिव अटल डुल्लु होरें जम्मू-कश्मीर च सेहत ढांचे गी तगड़ा बनाने लेई केन्द्री सेहत सचिव हुंदे कन्नै गल्लबात कीती।
5. जम्मू-श्रीनगर राष्ट्री जरनैली सिड़कै गी अद्दे-दुब्बे तौर पर ब्हाल करी दित्ता गेआ ऐ। छड़ी हौली गड्डिएं गी चलने दी खुल्ल दित्ती गेदी ऐ ते सिड़कै गी पूरी चाल्ली ब्हाल करने लेई जतन बरोबर जारी न।

<><><><><><>

CM Agriculture

मुखमन्त्री उमर अब्दुल्ला होरें राई-बाई मतल्लक खेत्तर गी तगड़ा बनाने दी अपनी सरकार दी वचनबद्धता गी फही पक्कर करदे होई इसी जम्मू-कश्मीर दी अर्थबवस्था दा इक महत्वपूर्ण चालक ते देसै लेई इक नमां उभरा करदा आदर्श करार दित्ता ऐ। मन्त्री-परमन्त्री दी कृषि वैज्ञानिक डाक्टर मंगला राय हुंदी प्रधानता आहली एच.ए.डी.पी. दी एपेक्स कमेटी कन्नै मिलदे होई उमर होरें एहू गल्ल आखी। इस कमेटी नै मुखमन्त्री होरें'गी राई-बाई खेत्तरै दे पूरे-पराते विकास सरबन्धी एच.ए.डी.पी. कार्यक्रम दी अमला-आवरी च हासल प्रगति बारै जानकारी दित्ती। ओमर होरें इस गल्लै पर चेचा जोर दित्ता जे करसानें गी भलेआं अज्जै-कल्लै दिएं तकनीकें

ते बजारें बारै जानकार बनाया जाना लोडचदा ऐ तांजे उंदे उत्पादन च बाद्दा होऐ ते एह्दे राहें राई-बाई ते एह्दे'नै जुडे दे खेत्तरें दा विकास बी जकीनी बनै।

<><><><><><>

Railway Min Trains

रेल मंत्री अश्विणी वैष्णव होरें जम्मू च हाड़ें दी मारै हेठ आए दे इलाकें च मदाद लेई बशेश रेलगड्डियें दे संचालन दी सराहना कीती ऐ। एह् रेलगड्डियां बड़ी सक्रियता दे कन्नै जरूरी राहत समग्री प्रभावत इलाकें च पुजाने दे कन्नो-कन्नी बक्ख-बक्ख इलाकें च फसे दे यात्रियें गी सुरक्षित उंदी थाहें तोहड़ी पुजाने ते कटरा, रियासी, बक्कल, दुग्गा, सावलकोट ते संगलदान ज्नेय इलाकें तोहड़ी महत्वपूर्ण सहायता पुजाने च बी बड़ी कारी दी साबत होआ करदि'आं ना। रेल मंत्री होरें प्रभावत परोआरें तोहड़ी बेल्ले सिर सहायता पुजाने च रेलवे दी इस कार्रवाई दी बड़ी मती सिफ्त कीती ऐ।

<><><><><><>

Satish Ess. Commodities

खुराक, सिविल सप्लाइज़ ते उपभोक्ता मामलें सरबंधी मैह्कमे दे मंत्री सतीश शर्मा होरें जम्मू-कश्मीर दे बक्ख-बक्ख हिस्सें तोहड़ी जरूरी चीजें-बस्तें दी सप्लाइ सरबंधी स्थिति दा आकलन करने लेई इक उच्चि सतह दी बैठक दी प्रधानता कीती। सरबन्धत अधिकारिएं दस्सेआ ऐ जे हर रोज तकरीबन 400 ट्रक्कें दे राहें, दौनें खित्तें दे बक्ख-बक्ख इलाकें च 36 ज्हार क्विंटल जरूरी चीजां-बस्तां पुजाइयां जा'रदिआं ना। मंत्री होरें खासतौरा पर मौसम च बदलाव दे दरान

<><><><><><>

Reasi Spl Teams

पिच्छले दिनें भारी बरखें करी होई दी तबाहू दी पच्छोकडै च रियासी दे जिला इंतजामिया नै लोके दे घरे, फसले, सिडके ते जरूरी सेवाएं गी पुजे दे नुक्सान दा आकलन करने लेई बशेश टीमां तैनात कीतीआं न। बक्ख-बक्ख महत्वपूर्ण मैहकमें दे अधिकारिएं दी शमूलियत आहिलयां एहू टीमां, मुकामी निकायें कन्नै नेडमा तालमेल बनाइयै कम्म करै करदिआं न तांजे लोके गी होए दे नुक्सान लेई बेल्ले सिर राहत ते मुआवजा उपलब्ध करोआया जाई सकै। एहदे अलावा जिले च बिजली ते पानी दी सप्लाई ते सिडके गी ब्हाल करने दा कम्म बी जंगी सतह पर तोढ चाढेया जा'रदा ऐ। मेडिकल टीमें गी अलर्ट पर रक्खेआ गेदा ऐ ते बसनीके गी गुजारिश कीती गेई ऐ जे ओहू उनेंगी होए दे नुक्सान बारै जानकारी सरबंध्यत टीमें कन्नै सांझी करना। प्रशासन नै प्रभावत परोआरें दी आबादकारी ते पुर्नब्हाली लेई हर मुमकन मदाद दा भरोसा दोआया ऐ।

<><><><><><>

CS Healthcare

मुख सचिव अटल डुल्लु होरें जम्मू-कश्मीर च सेहत सरबंधी ढांचे गी निगगर बनाने दे तौर-तरीके दा पता लाने दे मकसद कन्नै केन्द्री सेहत सचिव पुन्य सलीला श्रीवास्तव हुं'दे कन्नै इक बैठक लाई। इस मौके पर मुख सचिव होरें जम्मू-कश्मीर च एमबीबीएस दिएं सीटें च बाद्दे लेई उं'दा आभार जताया ते कन्नै मेडिकल कॉलेजें च माहिरा कोर्स शुरू करने ते सीटें च बाद्दे लेई उं'दे शा सैह्योग बी मंगेया। बैठक दरान अवंतीपोरा च बनाए जा'रदे एम्स अस्पताल गी बेल्ले सिर सबूरा करने ते जम्मू आहले एम्स अस्पताल दे विस्तार बारै बी गल्लबात कीती गेई। एहदे अलावा केन्द्र सरकार दी मदाद कन्नै चलाए जा'रदे सेहत सरबंधी प्रोजेक्टे च हासल प्रगति ते नमें सरकारी मेडिकल कॉलेजें च सुविधाएं दे बाद्दे-विस्तार दा बी जायजा लैता गेआ। केन्द्री सेहत सचिव होरें सब्भनें महत्वपूर्ण प्रस्तावें पर बेल्ले सिर कार्रवाई ते सैह्योग दा पूरा-पूरा जकीन दोआया ऐ।

<><><><><><>

GST Reforms Education

पूरे जम्मू-कश्मीर दे लोकें सरकार आसेया हाल च गै घोषित कीती गेदी GST दरें च कटौती दा सुआगत कीता ऐ। अज्ज अस शिक्षा दे क्षेत्र च कीते गेदे सुधारें दी गल्ल करचे ते इस महीने दी 22 तरीक थमां जेहड़ी GST दी नमीं दरां लागू होगन। उन्दे च स्टेशनरी दी बक्ख-बक्ख चीजें उप्पर GST 12 फीसद थमां घट्ट करियै छड़ा 5 फीसद करी दिता ऐ। एहदे च पेंसिल-शार्पनर-मोमीरंग-Exercise Book, Graph Book, Maps ते चार्ट शामिल न-जिसलै केह Eraser च GST 5 फीसदी थमां घटियै Nil होई जाग। इस छूट कन्नै विद्यार्थियों दे शिक्षा दे खर्चें च कमी औग। एहदे कन्नै ग्राएं च सरकारी स्कूलें च विद्यार्थियों गी होर बी मदद थहोग। इसदे कन्नै सिखलाई दे बुनियादी उपकरण सस्ते होई सकगन।

<><><><><><>

Udyam Yuva Fest

जम्मू-कश्मीर सरकार 27 सितम्बर गी मिशन युवा तैहत केन्द्र शासत प्रदेश दे सब्भनें पोलिटैक्रिक कालजें च Udyam Yuva Fest दी मेजबानी करोग। इस उत्सव दा थीम ऐ- “जित्थे विचार नवाचार कन्नै मिलदे न” यानि “Where Ideas Meet Innovation” इसदा मकसद युवाएं च रचनात्मक ते आलोचनात्मक सोच गी प्रोत्साहत करना ऐ। कार्यक्रमें च Quiz Competition-निबंध लेखन-भाषण ते पेंटिंग प्रतियोगितां शामिल होगन-जिंदे च विजेताएं गी 5 हजार रपे तक्कर दा नकद ईनाम दिता जाग। एह पैहलकदमी विद्यार्थियों गी सशक्त बनाने-नवाचार गी बढ़ावा देने ते पूरे जम्मू-कश्मीर च युवा प्रतिभाएं गी प्रदर्शित करने आस्तै मंच देने लेई सरकार दे जत्तें दा हिस्सा ऐ।

<><><><><><>

Highway

जम्मू-श्रीनगर राष्ट्रीय जरनैली शिड़क जेड़ी उधमपुर दे थडर कश ल्हास-पस्सियां पौने करी गड्डिएं दी आओजाई लेई बंद ही, गी आंशिक तौर पर खोलेआ गेआ ऐ। राश्ट्रीय जरनैली शिड़कें सरबन्धी भारती प्राधिकरण नै भरोसा दोआया ऐ जे शिड़क गी पूरी चाल्ली बहाल करने दा कम्म जारी ऐ ते तौले गै इसी पूरी चाल्ली आवाजाई लेई खोली दित्ता जाग। अजें छड़ा हल्की गड्डिएं गी गै श्रीनगर आहली भेठा जाने ते जम्मू औने दी इजाजत दित्ती गेई ऐ।

<><><><><><>

Municipal Cmt. Poonch

Municipal Committee पुंछ नै बस स्टैंड बजार इलाके दे कोल कच्छ अतिक्रमण ते मोमी लिफाफे खलाफ अभियान चलाया। Municipal Council पुंछ दे Chief Exercise अफसर Khalil Bandey हुंदी अगुआई च टीम नै 4 Kg शा मते बंदे होए दे मोमीलिफाफें जब्त कीते ते लोकें दी शकैतें उप्पर अमल करदे होई केई अतिक्रमणें गी हटाया गया। कमेटी नै दकानदारें ते विक्रेताएं गी भविक्ख च उल्लंघने बारे चेतावनी बी दिती ते लोकें गी सहयोग करने लेई आक्खेया। अधिकारियें आक्खेया जे इस चाली दी मुहिम अगगे बी जारी रौहग तां जे पुंछ गी साफ-सुथरा Polythene मुक्त ते सुलभ शैहर बनाया जाई सकै।

<><><><><><>